

Innovasjon Norge Hordaland
Pb 448 Sentrum
0104 OSLODato: 01.03.2018
Vår ref.: 2018/8106-1
Saksbehandlar: tormons
Dykkar ref.:

Handlingsprogram for nærings- og samfunnsutvikling i Hordaland 2018 - 2019

Tildelingsbrev til Innovasjon Norge Hordaland 2018 – kr. 23 440 000 Tilsegn-030-2018.

Fylkesutvalet vedtok Handlingsprogram for nærings- og samfunnsutvikling i Hordaland for 2018-2019 i møte 22. februar, sak 55/2018. Den totale økonomiske ramma i Handlingsprogrammet for året 2018, er kr 62 900 000. Fylkeskommunen overfører årleg eit beløp til Innovasjon Norge, som er øyremerka til bedriftsretta tiltak for å realisera måla og strategiane i Handlingsprogrammet. **Denne overføringa er i 2018 på kroner 23 440 000.**

Målgruppa for midla er små og mellomstore bedrifter og entreprenørar i verkeområdet for distriktretta investeringsstøtte i Hordaland fylke, og det er ingen endring frå 2017 i det geografiske verkeområdet. Det presiseres at sjølv om Innovasjon Norge Hordaland no er samanslått med Sogn og Fjordane, så skal midla gå til bedrifter og entreprenørar i Hordaland fylke.

1. Overordna føringar

Arbeidet som Innovasjon Norge Hordaland skal utføre er basert på dei oppdragsbrevna som kjem frå eigarane; staten og fylkeskommunen. Frå Hordaland fylkeskommune sin del legg vi Regional næringsplan for Hordaland 2013-2017 og Handlingsprogram for nærings- og samfunnsutvikling i Hordaland 2018-2019 (HNH) til grunn for alt arbeid som vert gjort med utviklingsmidla.

Vi viser òg til oppdragsbrev frå Kommunal- og moderniseringsdepartementet (KMD) til Hordaland fylkeskommune for 2018 (vedlagt). Brevet viser til nye overordna mål; Målet for regional- og distriktspolitikken til regjeringa er regional balanse gjennom vekstkraft, likeverdige levekår og berekraftige regionar i heile landet. Det skal vere ein tydeligare skilnad mellom regionalpolitikken og distriktspolitikken.

2. Oversikt over tilsegn stilt til disposisjon for 2018

På grunn av nedtrekk i overføringane frå KMD til fylkeskommunen dei siste åra, vil no den årlege styrka satsinga på entreprenørskap på kr 900.000, inngå som ein del av tilskotet på kr 23 440 000. Fylkeskommunen ynskjer likevel at denne styrka satsinga skal fortsette, og at denne ressursen òg får eit auka fokus på arbeidet med lokalsamfunnsutvikling som foregår i fylket.

Bakgrunnen for denne ekstra satsinga er eit fokus på at det er viktig med ei styrka og god koordinering av alt målretta arbeid med entreprenørskap i Hordaland. Partane er samde om at eit sterkt og variert økosystem for entreprenørskap, både med offentlege og private aktørar, over tid vil bidra til varige konkurransefordelar for gründerfylket Hordaland. Innovasjon Norge Hordaland skal vere det sentrale, operative organet for ei fortsatt styrking av entreprenørskapsarbeidet i fylket.

3. Mål for Innovasjon Norge Hordaland sin aktivitet

Ein av hovudstrategiane i næringsplanen er punkt 4.3 Meir entreprenørskap og innovasjon med følgjande innsatsområde: 1. Fleire gode grundere. 2. Fleire vekstkraftige verksemder. 3. Fleire innovative næringsmiljø. Dette er samanfallande med Innovasjon Norge sine eigne mål.

4. Fylkeskommunen si vektlegging av måla

I HNH 2018 - 2019 har fylkesutvalet vedtatt spesielle innsatsområder under strategien Meir entreprenørskap og innovasjon. Dei som er spesielt retta mot Innovasjon Norge Hordaland er:

Direkte støtte til bedrifter:

Vekst i eksisterande bedrifter gjennom målretta bruk av tilskot og lån.

Arbeide for å sikre kompetent og langsiktig kapital til nye idear og nye bedrifter, slik at fleire kjem gjennom oppstartsfasen og over i ein vekstfase.

Mobilisere til forskingsbasert innovasjon i bedriftene, mellom anna gjennom MobiFORSK, RFF Vestlandet og deltakarane i Regionalt FoU-forum.

5. Koordineringsbehov

Hordaland fylkeskommune er leiaren av den regionale partnerskapen for regional næringsutvikling, ansvarleg for strategisk planlegging og har det politiske ansvaret for heile breidda i det regionale samordnings- og utviklingsarbeidet, jamfør næringsplanen og handlingsprogrammet.

Innovasjon Norge Hordaland har som formål å fremje bedrifts- og samfunnsøkonomisk lønsam næringsutvikling, og utløyse ulike distrikt og regionar sine næringsmessige muligheiter gjennom å bidra til innovasjon, internasjonalisering og profilering basert på prioriteringar gjort i næringsplanen og handlingsprogrammet.

For å sikre at Hordaland fylkeskommune er godt informert om utfordringane i fylket og i organisasjonen, skal det vere dialog mellom fylkeskommunen og Innovasjon Norge Hordaland i forkant av eigarmøta i Innovasjon Norge. Det skal òg vere kvartalsvise statusmøter, der administrativ leiding frå fylkeskommunen møter direktør frå Innovasjon Norge Hordaland. På annakvart møte deltek òg politisk nivå i fylkeskommunen. I anledning eitt av desse treffpunkta i 2018, er det ynskjeleg med eit felles møte med Sogn og Fjordane fylkeskommune.

For Hordaland fylkeskommune er Innovasjon Norge ein sentral og viktig samarbeidspartnar, med stor kompetanse. Det er difor viktig at Innovasjon Norge deltek aktivt i den regionale partnerskapen, i regionale samarbeidsorgan og i prosessar, som til dømes Regionalt Næringsforum. Fylkeskommunen ynskjer vidare å presisere at ein ynskjer eit nært samarbeid og dialog om arbeidet med regionreformen, spesielt knytt til arbeidet med å desentralisere oppgåver frå staten til fylkeskommunen

Det er fylkeskommunen som er ansvarleg for å sikre at denne dialogen vert gjennomført.

6. Særlige regionale tilpassingar

Nettverk

Midla som fylkeskommunen løyver til Innovasjon Norge i kategorien 550.62, kan nyttast til ordninga bedriftsnettverk, inkludert fylkesoverskridande nettverk. Midla vil følgje dei same krava om tilhørighet i distrikta som tidlegare.

Omstilling og nyskaping

I HNH 2018-2019 vert det peika på at utvikling av langsiktig omstillingsevne er viktig for fylket. Ifølge KMD kan midla til omstilling nyttast i alle kommunar, og ikkje berre innanfor det distriktpolitiske området. Dette inneber at omstillingsmidla kan nyttast til konkrete prosjekt for etablerte bedrifter (SMB-ar) i heile fylket. Vi ynskjer, som tidlegare år, eit nært samarbeid med Innovasjon Norge når det gjeld førebuing og gjennomføring av omstillingsprosjekt og program.

Styrka satsing på entreprenørskap og lokalsamfunnsutvikling

Den årlege styrka satsinga på entreprenørskap på kr 900.000, skal òg inkludere arbeid med lokalsamfunnsutvikling. Satsinga inngår no i den årlege totalramma til Innovasjon Norge Hordaland.

Brukargruppe

Hordaland fylkeskommune ynskjer framleis eit spesielt fokus på kvinner, og at ein har eit mål om at 40 % av dei næringsretta verkemidla skal gå til bedrifter med kvinneleg leiar eller eigar. Jamfør mål og tiltak i strateginotat frå Innovasjon Norge Hordaland, «Auka kvinneandel i bruk av næringsretta verkemiddel», datert 16.10.2015.

7. Krav til dokumentering av resultat og rapportering

Fylkeskommunen skal sende tildelingsbrev innan 1. mars, så snart rapport for forrige år er motteken.

Midla frå Hordaland fylkeskommune til Innovasjon Norge vert overført to gonger i året, første gong rett etter at tildelingsbrevet er sendt, samt 1. september. Midla skal stå på ein eigen renteberande konto. Midla vert gitt til Innovasjon Norge Hordaland som tilskot utan tilbakebetaling. Dette gjer det mogeleg for Innovasjon Norge Hordaland å overføre rammer frå eitt år til eit anna for å kunne ta høgde for finansiering av større prosjekt. Tildeling som vert heil- eller delannullert vil på same måte kunne leggjast til ramma uavhengig av annulleringstidspunkt. Dersom føresetnadane for utbetaling ikkje er oppfylte, vil fylkeskommunen kunne krevje heile eller delar av tilskotet tilbakebetalt.

IN Hordaland skal rapportere på bruken av verkemidlar til fylkeskommunen innan 15. februar kvart år. Dette kjem i tillegg til sentral rapportering mellom IN sentralt og KMD. Overføring av rammer mellom år, samt renter som vert lagt til ramma, skal presiserast i rapporteringa. Ein tek atterhald om eventuelle endringar i rapporteringsrutinane. I utgangspunktet kan Innovasjon Norge sitt eige resultatmålingssystem nyttast.

Med talmaterialet skal det følgja ein kort, verbal analyse knytt til dei ulike satsingsområda og den regionsvise fordelinga. Innovasjon Norge må elles vera førebudd på å framskaffe andre, økonomiske oversikter i samband med mogelege pålegg frå KMD, eller etter ønskje frå fylkesutval/fylkesting. Ein føreset at Innovasjon Norge rettar seg etter dei retningslinene som departementet har lagt fast i samband med mål- og resultatstyring i høve til midlane frå KMD.

Fylkeskommunen har til ei kvar tid høve til å kontrollere at vilkåra for tilskotet vert haldne. Innovasjon Norge pliktar derfor å gje dei opplysningane som fylkeskommunen ber om, og som er regulerte i avtalar og retningsliner. Etter Stortinget sitt løyvingsreglement har Riksrevisjonen rett til å kontrollera at tilskotet vert nytta etter føresetnadene.

8. Kommunikasjon

Det er ynskjeleg at Innovasjon Norge Hordaland aktivt skal profilere fylkeskommunen i samband med forvaltning av overførte midler. Innovasjon Norge har i brev til fylkeskommunen, datert 6.juni 2006, gitt innspel til strategi for profilering. Denne avtalen byggjer på desse prinsippa, og følgjande aktivitetar vil vere sentrale:

- Presisere samarbeidet med fylkeskommunen i presentasjonar
- Presentere samarbeidsforholdet muntlig i kundesamtaler
- Bruka fylkeskommunen sin logo når IN inviterer til møter/seminar der det vert brukt fylkeskommunale midlar
- Andre tiltak skal vurderast

Oppdraget og medfølgjande tildelingar føreset at partane følgjer intensjonane i avtalar og regelverk, og held god kontakt undervegs. Særleg er det viktig at fordeling av arbeidsoppgåver som gjensidig ligg tett opp mot kvarandre, vert klargjorde. Kontaktperson hjå oss er: Nærings sjef Mette Nora Sætre.

Vi ser fram til eit godt samarbeid, og ynskjer lukke til i det vidare arbeidet i 2018.

Bård Sandal
fylkesdirektør, regional utvikling

Mette Nora Sætre
nærings sjef

Brevet er godkjent elektronisk og har derfor inga underskrift.

Kopi til:
Nina Broch Mathisen
Kommunal- og moderniseringsdepartementet
ØKONOMIAVDELINGA, her

Vedlegg
Handlingsprogram for nærings- og samfunnsutvikling i Hordaland 2018-2019
Tilskostbrev frå Kommunal- og moderniseringsdepartementet for 2018

